

BATAKURU PETRUUSU DIMMURU NDUN

1 ¹ Immorde e an min Sim'uunu Petruusu, *sahaabaajo e kurkaadu Iisaa Almasiihu on, haa e bee hendiibe gomdinal fotayngal hittude e ngal amen ngal, immorde e peewal Alla men e Dandoowo on, dun ko Iisaa Almasiihu on.

² Yo moyyere e buttu sowindirane on e hoore andugol Alla e Iisaa Joomi men on.

Fii Tabintingol Noddaandu men ndun

³ Ko bawgal makko ngal, Alla yediri en kala ko handuden fii ngurndan e wuuringol wano o faaliraa non, e nder andingol en on Noddirdo en mangural mun ngal e moyyuki mun kin. ⁴ Ko nii o yediri en fodaariiji burdi hittude e burdi mawnude din, fii, tippude e din fodaariiji, no tawdiredon e jikku makko on, kanko Alla, dun ko onon fuutinoobe boylaare aduna iwrunde e himmeeji bondi.

⁵ Ko sabu dun wadi, geree beyditon e gomdinal mon ngal jikku moyyo, e hoore jikku moyyo on kadi beyditon don gandal, ⁶ e hoore gandal ngal kadi beyditon waawugol hoore mun, e hoore waawugol hoore mun ngol kadi beyditon ηanjnagol, e hoore ηanjnagol ngol kadi beyditon wuuringol wano Alla faaliraa non, ⁷ e hoore wuuringol wano Alla faaliraa non beyditon giggol siddankaaku, e hoore giggol siddankaaku ngol beyditon giggol. ⁸ Si dii jikkuuji doo sowondirii e mon, di haday on wonude meerenteebe be alaa battane moyye fii andugol Iisaa Almasiihu Joomi men on. ⁹ Kono mo aldaa edin, haray ko bundo, mo felsataa, yejjitudo ko junuubaaji mun din labbinanoo kon.

¹⁰ Kodun wadi, yo musibbe, burtee wakkilaade fii haqinqingol noddaandu ndu noddadon ndun e ko subadon kon. Si on warrii non, on yanataa e nder bone few.

¹¹ Ko nii newnirantedon no yaajiri naatugol ka laamateeri poomayankeeri Joomi men on, on Dandoowo, dun ko Iisaa Almasiihu on.

Fii Jannde Yaadunde e Goonga on

¹² Kodun wadi si soono woo mi andintinay on fii dii piiji, hay si tawii hidon andi di e hidon tabiti e goonga mo hendidon on. ¹³ Mido sikki no haananimmi ka mi jokka andintingol on, fannin mido e nduu togooru, dun ko bandu an ndun, ¹⁴ ko fii mido andi mi sertay jooni e nduu bandu maayooru, wano Iisaa Almasiihu Joomi men on, banginiranimm non. ¹⁵ Kodun wadi si mi etoto fota, fii hay si mi iwoyii, no anditiroyon dii piiji.

¹⁶ Awa, hinaa men baarorbe taariikaaji sinciraadi yoyre, fewndo ko men banginani on ardu Iisaa Almasiihu Joomi men on e bawgal makko ngal. Kono men yi'irii gite amen den tigi mangu makko ngun. ¹⁷ Ko fii o hendike e juude Alla Baabaajo on teddungal e darja fewndo ko o nanunoo hawa iwrude ka darja heewudo bural on, ko Allaahu on daalani mo: «Oo doo ko Biddo an yidaado, mo mi weltori on.»¹⁸ Menen kadi, men nanii ngol kongol iwrungol ka kammu, fewndo men wondi e makko ka hoore fello hormorteengo.

¹⁹ Awa meden buri fellitude fii kongudi di annabaabe ɓen longinaa din, din di tawata si on wattanii yiila, haray on wadii ko moyyi, ɓay din kongudi no wa'i wa lampu hubbudo e nokkuure nibbitunde, haa nde fajiri on feeri, jaawiire nden toowi ndaygini berde mon den. ²⁰ Ko adii kon, andee wonde firo kongudi di annabaabe ɓen windi din, dun ko daaluyeeji di ɓe longinaa din, hinaa e neddanke iwri. ²¹ Ko fii kala kongol longinaangol hinaa e mijo neddanke iwi, kono ko *Ruuhu Seniido on yimɓe ɓen haaliri ko Alla longini ɓe kon.

Fii Jannoobe Penaale ɓen

(Yud. 1.4-13)

2 ¹ Woodiino e hakkunde jamaa on waditiibe annabaabe. Jannoobe fenaande woniroyay non e hakkunde mon onon kadi, hara hibe bisa janndeeji fenaandeeji e nder ko ɓe jannata kon, nawraydi e halkaare. Be yedda on Sooditudo ɓe, dun ko

Joomi on. Ko nii ɓe poodirta e mabbe halakuyee yaawudo.² Buy jokkoyay jiibaare mabbe nden, laawol goonga on hoynoyee sabu mabbe.³ Immorde e miile mabbe den, ɓe hiiliroya on kongudi sincaadi. Kono gila neebii kobe happanaa kon no badaade tun, awa hayrannde mabbe nden ɣoŋaa.

⁴ Ko fii Alla dandaali malaa'ikaabe wadunoobe junuubu ɓen, kono o nangi ɓe, o bugii ka yiite jahannama ka ɓe jolkaa don e nder niwre, ɓe jogoraa don fii jaaweede.⁵ O dandaali kadi ɓeya yimbe aranbe, kono ko njeetato o acci e mabbe, goddo on ko Nuuhu, on waajotonoodo fii peewal ngal, fewndo ko Allaahu on acciti waamere nden e hoore jamaa ɓe rewataa mo ɓen.

⁶ O happeni kadi dee ca'e Saduma e *Amuura mulugol de, watta de ndoondi, fii wadangol ɓe rewataa mo ɓen kanko Alla misal.⁷ Kono o dandi Luutu feewudo on, on mo ɓernde mun wondunoo e sokola tiidudo sabu jikku jiibiido bee bonbe,⁸ ko fii on ko feewudo hodunoodo hakkunde mabbe, mo wonkii mun tampintenoo ɣande woo ɣande sabu angal peewal ngal o yi'aynoo ngal e ngal o nanaynoo ngal.

⁹ Awa dundoo fow no holli ko Joomiraado on andi ko honno o dandirta yimbe gomdinbe ɓen ndarndeede, o donkina ɓe feewaa ɓen haa ɣande jaawoore nden,¹⁰ tentinii ɓen jokkube himmeeji tuunudi balli mun, hoyna laamu Joomiraado on, dun ko bee suusube reedu, mawnintiniibe, ɓe hulataa aybinde ruuhuuji din ka kammu.¹¹ E hin-le malaa'ikaabe, burbe ɓe doole e mbawdi ɓen, jaawiraali ɓen yimbe hoyre yeeso Joomiraado on.¹² Kono ɓen jannoobe fenaandeebe ko wa'ube wa kulle buruure de alaa mijoo-miccoo, tagiraade fii nangeede mulee, ko fii hibe hoynude ko ɓe andaa. Be muliray wa kulle buruure nii,¹³ ko bone wonata njoddi boneeji mabbe din. Be tawi faale mabbe on ko jinangol mbeleede aduna tumberejalorma. Kobe wa'ube wa ella e waadere, bay hibe weltora daynugol on, hay nde hibe jaamida e mon.¹⁴ Gite mabbe den no heewi jinaa, awa kadi ɓe haabataa wadugol junuubu. Hibe pooda wonkiji di tabitaa din, nawra di e ko boni. Berde ɓen jannoobe fenaandeebe no eltiraa miile, ɓen ko ɓe faybe hudaabe,

¹⁵ bay ɓe accitii laawol feewungol ngol, ɓe majjirii sabu jokkugol laawol Bal'ama ngol, on biiddo Be'uura, yidunoodo njoddi heborndi bonki.¹⁶ Kono o feliraa sabu geddi makko din tigi, din geddi woni sabu haa mbabun kun, d'un ko mummuntehun kun, wowliri wa neddo, d'un hadi on annabaajo wadugol kuugal feetere.

¹⁷ Ben kobe bulli di alaa ndiyan, ko ɓe duule de hendu radotoo, ɓen no maranaa niwre burnde tekkude nden. ¹⁸ Immorde e yewtereeji mabbe manti e mehi, hibe huutora himmeeji jiibaare bandu fii poosugol ɓen fuutorbe karahan e juude wuuruɓe e majjere ɓen.¹⁹ Hibe foda ɓe ndimu, e hin-le kambe tigi kobe maccube ko nawrata e halkaare, ko fii mo kala ko maccudo ko fooli dun kon. ²⁰ Ko fii si tawii, bawto fuutagol tuundiji oo aduna sabu andugol mabbe Joomi on e on Dandoowo, d'un ko Iisaa Almasiihu on, si ɓe nangike kadi e pircol din tuundiji haa di foolii ɓe, haray sakkitorde mabbe nden buray aranere nden bonude. ²¹ No burani ɓe ka tawata ɓe andaano laawol peewal ngol, edii, andugol ngol, sela yamiroore hormorteende nde ɓe andinaa nden. ²² Dun haray ɓe tentinii ko ngol tindol goongawol wi'i kon wonde: «Saa'i kala bareeru ndun yiltitanto ko ndu tuutunoo kon», awa kadi: «Saa'i kala kosewii arngii e looteede ngin ruttitoto e rukagol ka loope.»

Fii Artugol Almasiihu on

3 ¹ Awa e hino batakuru dimmuru ndu mi windani on ndun, yo yibbe. E nder majji di didii non, mi windiranii on di fii andintingol on, walla on hebon miijooji laabudi, ² fii no anditiron kongudi di annabaabe laabube ɓen *hiitino din, e yamiroore Joomi on e Dandoowo en on, nden nde sahaabaabe ɓen hewtini on.

³ Ko adii kon, andee wonde ka nalaade sakkitore, yawitiibe aroyay heewube jalnori, wuuriroyaybe himmeeji mabbe din, ⁴ hara hibe wi'oya: «Ko honto ardu

^a2.15 Ada. 22

makko fodanoondu ndun woni? Ko fii gila baabiraabe ben maayi, fow no wa'i wano wa'unoo non gila aduna on fuddii.»⁵ Kono be tewi be yejiti wonde, ko daaluyee Alla on wadi si kammuuli din e leydi ndin woodiranoo, leydi ndin suutaa e ndiyan, ndi moyyiniraa ndiyan.⁶ Ko ndiyan kadi aduna feyfunoodo on muliraa ndiyan waamere.⁷ Kono ko on daaluyee Alla kadi wadi si kammuuli fewndiidi din e aduna fewndiido on maranaa yiite ngen jnande be rewataa Alla ben jaawetee halkee.

⁸ Kono no woodi tobbere nde on haanaa yejjitude, yo yibbe: jallal gootal ka Joomiraado on ko wa duubi wuluure, awa kadi duubi wuluure ko wa jallal gootal.

⁹ Awa Joomiraado on alaa nennude hunnugol fodaari makko ndin, wano wobbe miijori non. Kono ka liddu dun, o mujjani on tun, ko fii o yidaa hay gooto hayra. Kono ko o yidi, ko yo fow aru e tuububuyee.

¹⁰ Awa, jalaande Joomi on arday wa ngujjo. Nden jnande non kammuuli din muliray hito uuyungo, piiji oo aduna sunnee mula, leydi ndin kadi e kuude ko ndi wondi kon fejninee.¹¹ Bay dun fow non no e laawol mulirgol nii, haray pellet hidon haani wuuirde laabal e no Alla faaliraa non.¹² Awa e nder ko habbidon ardu jalaande Alla nden kon, etee fii no dun yaawira, dun ko ka kammuuli din mulirta yiite don, e ka piiji oo aduna taayirta nguleendi yiite don.¹³ Kono enen hidon habpii fodaari Alla ndin, dun ko kammu hesu e leydi heyri ka peewal ngal hodoyta don.

¹⁴ Kodun wadi, yo yibbe, e nder nden habbannde, etee fii, nde o aroyi, no o tawira on e nder buttu, hara on aldaa e waadere, on aldaa e ella.¹⁵ Jogoree munal Joomiraado men on wa kisiyee, wano Puulusa, oo musiddo men yidaado, windirani on non kajun kadi, tippude e faamu ngu o yedaa ngun.¹⁶ Kodun o woni wadude e bataake den fow, ka o wowli fii din piiji don, e ka windande mettude faamude den woni don, de tawata yimbe be faamaa ben e be tabitaa ben boylii

noone on, wano ɓe wadiri non e ko heddi e bindi din kon, fii hayrannde maɓbe kambe tigi.

¹⁷ Onon non, yo yiɓbe, ɓay on hajaama, reenee fii wota on selu jokkon dayni ɓe doftaaki yamirooje Alla den, haa ka yoolon tabital mon ngal. ¹⁸ Awa ɓeydee yaarude yeeso e nder moyere nden e andugol Joomi men on, on Dandoowo, dün ko Iisaa Almasiihu on, on mo mangural wonani jooni e haa poomaa. Aamiina!

DEUXIÈME ÉPÎTRE DE PIERRE

en Langue Pular (Fouta-Jalon)

République de Guinée

© 2013 Traducteurs Pionniers de la Bible

en collaboration avec

Mission Protestante Réformée